

Muhammad al-Xorazmiy nomidagi Toshkent axborot texnologiyalari universitetida o'quv va ilmiy ishlar sifatini oshirish hamda xalqaro standartlar darajasiga tenglashtirish bo'yicha xorijiy davlatlar, xususan Yevropa mamlakatlari tajribalarini o'rganish va ta'lim jarayonlariga qo'llash ishlari keng ko'lamda amalga oshirilmoqda. Yevropa ittifoqi **Erasmus+** dasturining **609564-EPP-1-2019-1-EL-EPPKA2-SBHE-JP** - sonli grant kelishuviga asosan universitetimiz **“MechaUZ: O'zbekistonda Mexatronika va robototexnika bakalavriat ta'lim yo'nalishini innovatsion g'oyalar va raqamli texnologiyalar asosida modernizatsiya qilish” (MechaUZ: Modernization of Mechatronics and Robotics for Bachelor degree in Uzbekistan through Innovative Ideas and Digital Technology)** xalqaro loyihasining ijrochisi sifatida o'z faoliyatini boshladi.

Loyiha 2020-2022-yillarga mo'ljallangan bo'lib, unda O'zbekiston Respublikasi oliy ta'lim muassasalarining mavjud **“Mexatronika va robototexnika”** bakalavriat ta'lim yo'nalishida kadrlar tayyorlash holatini o'rganish, zamonaviy talab va takliflar asosida yangi ta'lim yo'nalishini ochish, mavjud ta'lim yo'nalishlarini modernizatsiya qilish, o'quv laboratoriyalarni zamonaviy moddiy-texnik vositalar bilan jihozlash nazarda tutilgan.

Yevropalik hamkorlar bilan birgalikda loyiha doirasida olib boriladigan ishlarni tashkillashtirish, amalga oshirish, muvofiqlashtirish va ularning monitoringini yuritish yuzasidan universitet rektorinig 2019-yil 3-oktyabrdagi 1615-sonli buyrug'i bilan loyihaning asosiy ishtirokchilari tarkibi tasdiqlangan.

Ushbu xalqaro loyihani amalga oshirish 2020-yilda boshlanib, loyiha hamkorlarining ilk uchrashuvi (**Kick-off Meeting**) 2020-yil 10-14-fevral kunlari **Gretsiyaning Saloniki** shahridagi Sheffield universitetining Xalqaro fakultetida (**University of Sheffield**) tashkil etildi. Ushbu uchrashuvda yevropa davlatlarining 6 ta oliy ta'lim muassasasidan va O'zbekiston Respublikasining 6 ta oliy ta'lim muassasasidan hamda O'zbekiston Respublikasi oliy va o'rta maxsus ta'lim vazirligidan vakillar ishtirok etishdi.

Loyiha doirasidagi hamkor ta'lim muassasalari:

- **Xalqaro Xellenik universiteti, Gretsiya**
- **Janubiy-Sharqiy Yevropa tadqiqot markazi, Gretsiya**
- **Vilnyus Gediminas texnika universiteti, Litva**
- **Liyepaya universiteti, Latviya**
- **Vidzeme amaliy fanlar universiteti, Latviya**
- **Viana-du-Kashtelu politexnika instituti, Portugaliya**
- **Andijon mashinasozlik instituti, O'zbekiston**
- **Toshkentdagi Turin politexnika universiteti, O'zbekiston**
- **Farg'ona politexnika instituti, O'zbekiston**
- **Toshkent axborot texnologiyalari universiteti, O'zbekiston**
- **Qarshi muhandislik-iqtisodiyot instituti, O'zbekiston**
- **Toshkent davlat texnika universiteti, O'zbekiston**
- **Oliy va o'rta maxsus ta'lim vazirligi, O'zbekiston**

Uchrashuvda bir qancha masalalar muhokama etildi, jumladan **“Loyihani tayyorlash va qator rivojlangan mamlakatlarning mexatronika va robototexnika ta'lim yo'nalishidagi o'quv dasturlarini tahlil qilish”, “Yangi bakalavr ta'lim yo'nalishi dasturini ishlab chiqish”, “O'zbekistonlik o'qituvchilar, xodimlar va muhandislar uchun yangi o'quv kurslarini yaratish va treninglarni tashkil etish”** va boshqa shu kabi masalalar muhokama etildi.

Tashrif davomida loyiha ishtirokchilar uchun Gretsiyaning Saloniki shahrida joylashgan Aristotel maydoniga, Aleksandr Makedonskiy maydoniga hamda Xalqaro Xellenik Universitetiga (International Hellenic University) va uning ilmiy laboratoriyalari va Masofaviy o'qitish markaziga ekskursiya tashkil etildi.

Uchrashuv yakunida bir qancha vazifalar va uning ijrosi bo'yicha navbatdagi uchrashuvlar vaqti belgilab olindi. Loyiha davomida 2020-yil hisobidan yana ikkita uchrashuv o'tkaziladi. Ulardan dastlabkisi 2020-yil 30-mart kuni skayp video muloqot tizimi orqali onlayn ko'rinishda hamda ikkinchi uchrashuv 2020-yil 21-sentyabr kuni Toshkent shahrida o'tkazilishi rejalashtirilgan.

TATU matbuot xizmati